

四庫全書

史部

欽定四庫全書

史部

欽定續通志卷四十一

編修_臣謝振定覆勘

總校官原任侍講_臣王燕緒

欽定四庫全書

欽定續通志卷四百三十一

列傳

金九

楊伯雄

伯淵

張用直

劉樞

毛碩

李上達

高德基

完顏鄂博庫

劉徽柔

賈少冲

益

伊喇鄂爾多

珠勒根彥忠

張九思

高衍

楊邦基

丁暉仁

曹望之

大懷貞

盧孝儉

李偲

楊伯雄字希雲真定藁城人皇統二年進士海陵留守
中京其父邱行在幕府伯雄來省海陵深器之久之調
韓州軍事判官有二盜詐稱賈販實欲劫取伯雄伯雄
執而詰之并獲其黨十餘人一郡駭服遷應奉翰林文
字是時海陵執政屬使時至其第伯雄不往他日怪問

之對曰君子受知於人當以禮進附麗奔走非素志也
海陵篡立問治道何貴對曰貴靜乙夜復問鬼神事伯
雄進曰漢文帝前席賈生不問百姓而問鬼神後世譏
之陛下不以臣愚陋幸及天下大計鬼神之事未之學
也固問乃曰臣家有書記人死復生或問冥官何以免
罪答曰舊置一歷白日所為暮夜書之無不可書者故
復生耳海陵為之改容夏日與登瑞雲樓納涼命賦詩
卒章云六月不知蒸鬱到清涼會與萬方同海陵忻然

以示左右曰伯雄出語不忘規戒為人臣當如是矣海陵議征江南伯雄奏晉武平吳皆命將帥何勞親總戎律不聽乃落起居注不復召見大定初為少詹事兄子蟠為左贊善言聽諫從時論榮之集古太子賢不肖為書號瑤山往鑒進之及進羽獵保成等箴皆見嘉納六年帝幸西京欲因往涼陞避暑伯雄諫不聽及至涼陞徼巡果有疎虞帝還謂近臣曰羣臣有幹局者衆矣如伯雄忠實皆莫及也十二年丞相石琚致仕舉伯雄以

代時論以爲得人復權詹事知無不言匡救甚多凡官僚有詭隨者人必稱楊詹事以愧之尋除平陽尹先是張浩治平陽有惠政及是百姓稱之曰前有張後有楊徙河中尹卒謚莊獻弟伯傑伯仁族兄伯淵字宗之早孤事母以孝聞疎財好施喜收古書天會十四年進士知泰安軍有惠政百姓刻石紀其事四遷山東東路轉運使正隆末羣盜蠭起州郡往往罹害獨濟南賴伯淵保全大定三年致仕卒

張用直臨潢人少以學行稱遼王宗幹延置門下海陵
與其兄充皆從之學天眷二年賜進士及第除禮部郎
中海陵即位為太子詹事嘗謂曰朕雖不能博通經史
亦粗有所聞皆卿平昔輔導之力太子方就學宜善道
之朕父子並受卿學亦儒者之榮也為賀宋國正旦使
卒於汴海陵深悼惜之養子始七歲特授武義將軍

劉樞字居中通州三河人少以良家子從軍屯河間同
輩皆騎射獨樞刻意經史登天眷二年進士調唐山主

薄改飛狐令蔚州刺史恃功貪污怒樞無所奉撫以他
事繫獄將致之死會廉察使至得實守倖而下皆抵罪
廢錄樞治狀入優等躡遷奉直大夫張浩營建燕京宮
室選樞分治工役遷尚書刑部員外郎鞫治太原尹圖
克坦額呼楚克反狀旬日獄具大定間為中都路轉運
使卒於官

毛碩字仲權甘陵人宋末試弓馬子弟碩中選調高陽
關路安撫司准備差使歷河間尉兵馬都監宗望軍至

碩以本部迎降齊國建由淮東路第一副將擢知滑州
劉麟伐宋充行營中軍統制軍馬天眷間歷汴京路山
東西路兵馬都監皇統元年權知拱州宋將張俊據亳
州柘城酒監房人傑叛以應俊碩發兵討之至柘城諭
意耆老縣人縛人傑以降碩召百姓慰安衆皆感悅刻
石紀其事四年真授拱州刺史元帥宗弼承制授武義
將軍改知曹州有書生投書於碩辭涉謗訕碩延之上
座謝曰使碩常聞斯言庶乎寡過士論嘉之遷鄭州防

御使尋改通州天德二年充陝西路轉運使碩奏陝右
邊荒種藝不過麻粟蕎麥賦入甚薄市井交易惟川絹
乾薑商賈不通酒稅人耗減請視汴京燕京例給交鈔
通行

按食貨志金初用遼宋舊錢貞元二年蔡松年始
復鈔引法遂製交鈔與錢並用本傳載碩之奏在

天德間則交鈔固
不始於蔡松年也

而鞏會德順道路多險鹽引斤數太

重請一引分作三四以從輕便朝廷皆從之秦州倉粟
陳積百姓有支移者止就本州折納其直公私便之改
河東南路轉運使上言頃者定立商酒課不量土產厚

薄戶口多寡及今昔物價之增耗一概理責之致監官被繫失身破家折傭逃竄或姦吏盜有實錢而以賒券輸官故河東積負至四百餘萬貫公私苦之請自今禁約酒官不得折准賒貸惟許收用實錢則官民俱便秩滿除南京路都轉運使大定六年致仕卒於家碩文雅好士性謹飭每見古人行事有益於時者常書置座右以為莅官之戒云

李上達字達道曹州濟陰人在宋時以蔭補官累遷東

平府司戶參軍達蘭取東平上達降並給軍須號稱辦
治齊國建為吏部員外郎攝戶部事劉豫行什一之法
樂歲輸多歉歲寡取之然收斂之時民不以實輸官官
亦不肯盡信於是告訐起而獄訟繁公私苦之上達論
其弊豫改定為五等之制齊國廢以河南與宋人上達
隨地入宋宗弼復取河南上達為同知大名尹按察陝
西河南是時關陝蒲解汝蔡民饑上達輒以便宜發倉
粟賑百姓累遷知山東西路轉運使上達到官再期比

舊增三十餘萬貫戶部以其法頒之鄰路上達長於吏事能治繁劇猾不能欺所至稱之卒於官

高德基字元履遼陽渤海人皇統二年登進士第六年為尚書省令史海陵為相專愎自用德基每與之詳辨及篡位欲都燕京命德基攝燕京行臺省都事累遷戶部郎中正隆時營建南京宮室德基與李濤蕭中一俱為營造提點轉同知開封尹大定三年以察廉治狀不善下遷同知北京路都轉運使事是年秋土河泛濫水

入京城德基命開長樂門䟽入御溝以殺其勢水不爲害遷刑部侍郎七年改中都路都轉運使九年轉刑部尚書有犯罪當死者宰相欲從末減德基曰法無二門失出猶失入也不從及奏上帝是刑部議因諭諸尚書曰自朕即位以來以政事與宰相爭是非者德基一人而已自今部上省三議不合即具以聞為宋主生日使及還宋人禮物外附進臘茶三千胯不親封署德基曰姪獻叔而不署是無名之物也却之十一年改戶部尚

書上疏乞免軍須房稅等錢減農稅及鹽酒等課未報
隨朝官俸粟折錢增高市價與之多出官錢幾四十萬
貫帝以其取悅宰執近臣濫出官錢決杖八十詔自大

定十一年十一月

按世宗紀大定十一年十一月丁亥
有事於園丘此處誤作八月謹改

郊祀赦後尚書省御史臺戶部轉運司警巡院多支俸
粟折錢皆追還之德基降蘭州刺史十二年卒于錫入

忠義傳

完顏鄂博庫會寧府海古勒寨人年十三選充女真字

學生補上京女真吏再習小字蕪通契丹文字充尚書
省令史天德初除吏部主事鞫問扎蘭路詐襲穆昆事
人稱其能擢右拾遺累遷右司郎中大定二年秩滿當
代世宗喜其公忠善敷奏特詔再任幹罕已平詔罷契
丹明安穆昆其原管戶口及從幹罕作亂來降者皆隸
女真明安穆昆遣鄂博庫分置人戶賑贍其貧乏其未
經罷去明安穆昆合承襲者仍許承襲兼括買契丹馬
匹頃之改同知大興尹遷橫海軍節度使讞囚能得其

情人以為不寃五年卒於官

劉徽柔字君美大興安次人天眷三年擢進士第歷真定藥城主簿遷洪洞令徽柔明敏善聽斷縣人楊遠訴夜雨屋壞壓其姪死徽柔熟視曰汝利姪財而殺之乃誣雨耶叱付獄其人立伏遂寘於法秩滿縣人遮戀為立生祠刻石頌德正隆二年入為大理評事遷司直大定二年同知河東南路轉運使事以廉第一改知平定軍累遷中都路轉運使卒於官

賈少冲字若虛通州人勤學家貧甚嘗道中獲遺金訪其主歸之天會中再伐宋調及民兵少冲甫冠代其叔行中天眷二年進士劉筈欲妻以妹辭不就調營州軍事判官遷定安令蔚州刺史恃貴不法少冲獨守正不阿用廉進官一階累遷河中府判官見海陵寢失道秩滿乃不求仕大定二年調御史臺典事遷刑部郎中往北京決獄奏誅首惡牽連者皆釋之全活凡千人以本職攝右司員外郎除同知河間尹數月入為秘書少監

兼起居注左補闕十四年為宋主生日副使宋人別致珍異少冲曰行人受賜自有常數敢以賂辱君命乎不受使還遷右諫議大夫秘書監起居注如故十七年請老不許除衛州防禦使歷順天軍節度使少冲外柔而內剛嘗執奏刑名甚堅帝嘉其有守性簡易不喜言利嘗教諸子曰蔭所以庇身筦庫不可為也聞者尚之子益益字損之少穎悟如成人大定十四年父少冲使宋益侍行時宋人常爭起立接書之禮少冲問益曰即宋人

欲變禮持議不決奈何益曰守死無辱可謂使矣少沖
大奇之中大定十九年進士調河津主簿丁父憂去官
察廉起復礬山令補尚書省令史丁母憂服闋除定海
軍節度副使累官順天軍節度使大安初召為吏部尚
書改鎮安國軍益調民夫修完城郭為戰守備按察使
止之不聽曰治城守臣事也按察何預既而兵至以有
備解去改橫海定國軍節度使道阻不赴貞祐二年召
為太常卿上防秋十三事與戶部尚書李革論遷河北

軍民不便不報明年致仕元光九年卒

伊喇鄂爾多一名巴錦系出遼五院司通契丹宇天會三年從伐宋遇戰輒先登屢獲偵人以功補尚書省令史十五年籍發諸部兵將與右丞蕭慶會於山後時官軍竄而南者凡數千鄂爾多邀擊之盡獲其輜重悉送有司遷修武校尉宗弼復河南鄂爾多督諸路帥臣進討事定遷宣武將軍皇統二年同知昭德軍節度使事以廉升孟州防禦使正隆間轉同知北京留守事會伊

克河闌子山等明安契丹謀亂時方發兵討之別遣鄂爾多押軍南下至松山縣為賊黨講格所執欲推為主盟鄂爾多怒曰我受國厚恩豈能從汝反耶賊欲害之鄂爾多說其監奴因得脫還大定初為博州防禦使遷利涉軍節度使先是有農民避賊入保郡城寄錢鄰家賊平索之鄰人不與訴於縣縣官以無契驗却之乃訴於州鄂爾多陽怒械繫之捕其鄰人詰之曰汝鄰坐劫殺人指汝同盜鄰人懼始自陳有欺錢之隙乃責歸所

隱錢而釋之郡人駭服改通遠軍節度使卒

珠勒根彥忠本名斡克善哈斯罕人好學通吏事天會十四年選充兵部孔目官升尚書省令史除右司都事天眷七年改大理丞為會寧少尹進同知會寧府事入為吏禮部郎中貞元二年進本部侍郎海陵凡有所疑常使彥忠裁決彥忠據法以對間有不合召讓之彥忠執奏如前終無阿屈海陵壯之明年除御史中丞歷戶部侍郎侍衛親軍副都指揮使海陵南伐除南京路都

轉運使大定二年改大名尹兼本路兵馬都總管四年
入為刑部尚書詔規措北邊艱食戶口及泰州臨潢接
境度宜安置堡戍七駐兵萬三千芻糧之用就經畫之
還朝未及入對以疾卒彥忠性孝友嘗使宋所得金帛
盡分兄弟親友云

張九思字全行錦州人皇統初補行臺省女真譯史除
易州同知三遷亳州防禦使副歸德尹劉仲延受宋國
歲貢於泗州往歲受歲貢者每以幣物不精責宋使者

宋使私饋銀幣以為常九思獨不肯受仲延從之自是私饋遂絕自大理評事再遷大理少卿清池令雙申陳其父虔於天眷初知永安軍遇叛寇孟邦傑執而脅之不從遂被害乞正班用蔭大理寺議虔子止合雜班叙九思曰虔奮不顧身守節以死其子宜正班用蔭以勸忠孝世宗從之改工部郎中大興少尹同知中都都轉運使事轉刑部侍郎改工部九思所守清約然急於進取一切以功利為務不恤百姓詔檢括官田凡地名疑

似者如皇后店太子莊

食貨志作太子務

燕樂城之類不問民

田契驗一切籍之復有鄰接官地冒占幸免者世宗召還責之轉御史中丞奏言屯田明安人為盜徵償家貧輒賣所種屯地請家貧不能徵償者令事主以其地招佃收其入估賈與徵償相當即以其地還之臨洮尹完顏讓乞用九思議詔從之遷工部尚書帝謂左丞張汝弼曰九思耄矣頗強執自用欲令外補何如時九思子若拙為尚書省令史冒填詔敕事覺亡命汝弼奏其事

帝曰九思豈不知若拙處耶可免其官捕若拙獲日授職九思聞命惶懼因感疾卒

高衍字穆仲遼陽渤海人敏而好學自少有能賦聲同舍生欲試其才使一日賦十題衍執筆怡然未暮十賦皆就俱可觀登進士第乞歸養逾二年調溲陰丞召為尚書省令史除右司都事母喪去官起復吏部員外郎攝左司員外郎大奉國臣者永寧太后族人先為東京警巡院使以賊免去欲因太后求見海陵不許衍與奉

國臣有鄰里舊擬為貴德縣令海陵大怒杖衍降為清水縣主簿居二年為大理司直累遷吏部郎中大定初轉左司郎中世宗孜孜求諫羣臣承順旨意無所匡正使衍傳詔臺省百司曰凡上書言事或為沮遏許進表以聞遷吏部尚書每季選人至吏部託以檢閱舊籍謂之檢卷有滯留至後季猶不得去者衍三為吏部知其弊歲餘銓事修理選人使之五年為賀宋國生日使中道得疾去職七年卒

楊邦基字德懋華陰人父絢宋末為易州州佐宗望伐宋蔡靖以燕山降易州來附絢被殺邦基匿僧舍中得免既長好學天眷二年登進士第調灤州軍事判官遷

太原交城令太原尹圖克坦恭貪污不法命屬縣輸金

邦基獨不與秉德

按熙宗紀天眷八年遣參知政事秉德廉察官吏本傳誤作秉德證據改

廉察官吏尹與九縣令皆免去邦基以廉為河東第一

召為禮部主事遷兵部員外郎攝吏部差除坐銓注李

慶之忤海陵意降坊州宜君

按地理志坊州隸縣二宜君其一也原文作宜君今

改
正 簿轉高密令大定初太師張浩薦邦基人材可用請

除刑部郎中帝許之改太府少監累遷祕書監兼左諫
議大夫修起居注中都警巡使張子衍道遇皇太子衛
仗立馬市門不去織衛士訶之子衍鞭衛士御史臺劾
奏子衍邦基以姻故為子衍求解及入見顯宗求脫子
衍罪詔削子衍官兩階邦基坐削官一階出為西京留
守同知徙山東東路轉運使永定軍節度使致仕二十
一年卒邦基能屬文善畫尤以畫名當世云

丁暉仁字藏用大興府宛平人父筠以吏補州縣所至有治聲致仕後鄉里鬪訟者多就質焉暉仁冲澹寡欲讀書外無他好遼季避難間關道塗未嘗釋卷皇統二年登進士第調武清縣丞縣經兵革後無學校暉仁召邑中俊秀子弟教之學百姓欣然從之調磁州軍事判官以廉攝守事遷和川令前令罷奕不視事羣小越法干禁無所憚暉仁申明法禁皆屏息有董祐者最强悍畏服暉仁以刀斷指誓終身不復犯法凡租賦與百姓

前為期率比他邑先辦歷北京推官再遷大理司直大
定三年除定武軍節度副使而節度使同知皆闕諱仁
為政無留訟改大理丞吏部員外郎轉戶部郎中時賈
少冲為刑部郎中帝以少冲為人柔緩不稱刑部之職
乃以諱仁易之坐尚廕局官私用官芻違格解職改祁

州刺史祁州

按金地志祁州與定武軍俱屬河北西路傳稱為定武吏郎則當是祁州至祁州

則屬河東北路矣原本訛祁為祁謹改正

為定武支郡士民間諱仁之官歡

迎界上相屬不絕改同知西京留守事首興學校以明

養士之法徙陝西西路轉運使二十一年卒於官

曹望之字景蕭其先臨潢人遼季移家宣德天會間選
充女真字學生年十四業成除西京教授歷行臺省令
史除右司都事吏部侍郎田穀素薄望之望之願交不
肯納遂與蔡松年許霖構致黨獄陷穀等於死天德元
年調同知石州事坐事免久之除絳陽軍節度副使入
為戶部員外郎詔望之以牛萬頭分給安春八明安徙
居南京者薩巴反望之轉致甲仗八萬自洛州輸燕子

城又運米八十萬斛由蔡水入淮饋伐宋諸軍一日而
至進本部郎中特賜進士及第大定初討幹罕望之主
軍食給與有節帥府以捷入告議者欲遂罷轉輸望之
以為元惡未誅不可弛備既而大軍追討果賴以濟以
勞進一階兼同修國史請於大鹽澤設官權鹽聽民以
米貿易民成聚落可以固邊圉其利無窮從之其後凡
貯米二十餘萬石及東北路歲饑賴以濟者不可勝數
三年帝以正隆兵興農桑失業遣望之及魏子平李滌

等分道勸農問職官臧否望之還奏乞汰去諸路胥吏
可減其半詔胥吏如故惟禁用貼書遷本部侍郎領覈
實繕修大內財用費用大省復以勞進階望之家奴袁
一言涉妖妄大興府鞠治望之恐使戶部令史劉公輔
問其事於大興少尹王全全具語其事御史臺劾奏劉
公輔等泄獄情決杖除名頃之運河堙塞不治乃用陸
運世宗責望之往治之太宗實錄成望之等賜銀幣有
差望之嘆賞薄世宗以其不忠出為德州防禦使到官

有惠政百姓為立生祠改同知西京留守事上書論便
宜事其一論山東河北明安穆昆與百姓雜處民多失
業陳蔡汝潁之間土廣人稀宜徙百姓以實其處復數
年之賦以安輯之百姓亡命及避役軍中者閱實其人
使還本貫或編近縣以為客戶或籍姓名留為佃戶州
縣與明安事干涉者無相黨匿庶幾軍民協和盜賊弭
息其二論薦舉之法宜令宰執歲舉三品二人御史大
夫以下內外官終秩舉二人終秩不舉者遇轉官勒停

三品者削後任俸三月其待以不次者宰執具才行功實以聞吏部每季圖上外路職官姓名大書贓污者於其名下使知畏懼年六十以上者終更赴調有司察其視聽精力老疾不堪釐務給以半祿罷遣其三論守邊將帥及沿邊州縣官漁剝軍民多興力役宜歲遣監察御史周行察之邊部獄訟招討司毋得輒遣白身人徵斷宜於省部有出身女真契丹人及縣令丞簿中擇廉能者因其風俗畧定科條務為簡易徵斷羊馬入官籍

數如邊部遇饑饉即以此賑給之軍中舊籍死則一村均錢補買往往鬻妻子賣耕牛以備之臣恐數年後邊防困弊臨時賑濟費財十倍而無益當早為之所以實邊備官給軍箭用盡則買補皆朽鈍不堪用可每歲給官箭一分以補其闕邊民闕食給米地遠負重往往就倉賤賣而去可計口支錢則公私兩便陝西正副宜如明安穆昆用土人一員隊將亦宜參用土人久居其任增弓箭田復其職役以廉吏為提舉舉察總管府以下

官農隙校閱以嚴武備則太平之時有經畧之制矣又
論六鹽場用人宜令戶部公議辟舉論漕運先計河倉
見在幾何通州容受幾何京師歲費幾何今近河州縣
歲稅或六七萬石小民有入資之費富室收轉輸之利
宜計實數以科稅入論民間私錢苦惡宜以官錢五百
易私錢千期一月而盡過期以銷錢法坐之論州府力
役錢物戶部頒印署白簿使盡書之以俟審閱有畏避
不書者坐之論工部營造調發妨民生業諸路射糧軍

約量人數習武藝期以三年成以息調民書奏多見采
納以本官行六部事於北邊召拜戶部尚書時戶部尚
書高德基坐高估俸粟責降世宗念望之各出納或懲
德基也使人諭之曰要在平估而已望之久習事有治
錢穀名性剛愎頗沾沾自露希覬執政世宗以望之急
於見知涉躁進未及用尋卒以其子淵為奉御澤為筆
硯承奉望之初不學及貴稍知讀書遂刻苦自致有詩
集三十卷

大懷貞字子正遼陽人皇統五年除閤門祇候累官右宣徽使正隆伐宋為武勝軍都總管大定二年除洺州防禦使累遷彰國安武軍節度使縣尉獲盜得一旗上圖亢宿詰之有謀叛狀株連幾萬人懷貞當以亂民之刑請誅其首亂者十八人餘皆釋之嘗以私忌飯僧數人就中一僧異常懷貞問其曾為盜殺人否對曰無之後三日詰盜果引此僧皆服其明察改興中尹錦州富民蕭鶴壽塗中殺人匿府少尹家有司捕不得懷貞以

計取之寘於法改彰德軍節度使卒

盧孝儉宣德州人登天眷二年第累官太原少尹大定二年陝西用兵尚書省發本路稅粟赴平涼期甚嚴迫孝儉易以金帛馳至用省而不失期并人稱之用廉進官二階遷同知廣寧尹廣寧大饑民多流亡失業乃借僧粟使平其價市與貧民累遷山東東路轉運使孝儉素褊躁與同僚王公謹失歡其子嘗私用官帑孝儉不知也既而改河北西路轉運使公謹乃發其事孝儉聞

被逮莫測所以行至章邱自縊死

李偲字子友定州安喜人中天眷二年進士調遼山簿累官戶部主事除同知河東南路轉運使事大定初改同知中都路轉運使事三年權知登聞檢院再遷戶部侍郎改沂州防禦使沂南邊郡戶部借民閑田種禾取藁秸以備警急偲曰如此則農民失業具奏止之轉運司牒郡輸粟胸山調急夫數萬人時久雨泥濘輓運不前偲遣吏往胸山刺取其官廩見儲糧數可支半歲即

具其事牒運司請緩期毋自困百姓先是郡縣街陌間
聽民作廛舍取其僦直至是罷收僦直廛舍一切撤毀
他郡奉承號令督百姓必盡撤去僦獨教民撤治前却
不齊者三五所使巷道端正即已民便之改陝西西路
轉運使卒

欽定續通志卷四百三十一

欽定四庫全書

欽定續通志卷四百三十二

列傳

金十

富察世傑

蕭懷忠

伊喇諧達

富珠哩阿老罕

完顏薩哈

龐迪

伊喇成

舒穆魯卞

伊喇道

楊仲武

趙興祥

舒穆魯榮

敬嗣暉

富察通

鈕祜祿額特埒

富察世傑本名阿薩爾哈斯罕鄂都河人徙遼陽初隸
宗弼軍每與武士角力賭羊輒勝能以拳擊四歲牛折
其脅有糧車陷淖中七牛挽不能出世傑手出之宗敏
為東京留守召置左右海陵篡位用為護衛賂以重賞
令除兄弟有異志者世傑受詔而不肯為海陵怒面責
之世傑曰臣不以非道害物海陵愛其勇不之罪也正

隆四年盡籍諸路兵伐宋他使者唯恐不如詔得數多

世傑往海蘭路得數少海陵怪問之對曰海蘭地接高

麗今若多籍其丁即有緩急何以為備海陵喜曰他人

用心不能及也除同知安國軍節度使事時徵發不已

民不堪命犯法者衆邢人

按金地理志邢州宋信德府天會七年除為邢州置安國

軍節度使世傑時為節度同知邢人正其屬也本傳訛作邢人謹改正

無長吏獄囚積四

百餘人世傑到官月餘決遣畧盡入為宿直將軍以事

往呼爾哈路還奏契丹部族大抵皆叛百姓驚擾不安

今舉國南伐賊若乘虛而入雖得江淮無益也宜先討
平契丹南伐未晚海陵不悅曰詔令已出矣今以三萬
兵選將屯中都以北足以鎮壓世傑又曰若東土大族
附於賊恐三萬衆未易當也海陵不聽及發汴京授鄭
邢防禦使領武捷軍副總管大軍渡淮世傑以軍三千
護糧運東下敗宋兵數千人奪其戰船甚衆至和州境
擊宋兵五萬人走之明日使其子烏達領二百八十騎
為應兵自領八百騎前戰宋兵奔潰大定初世傑取陝

州敗宋兵石壕鎮復敗宋援兵三千人遂圍陝州宋兵
二千自潼關來世傑以兵二百四十迎擊之射殺十餘
人宋兵敗走復敗之於土壕山生擒一將復以四穆昆
軍敗宋兵於土華復圍陝州親率選卒二百餘人穴地
以入城遂拔再破宋軍三萬人復號州未幾為衛州防
禦使改河南路統軍都監召赴闕帝慰勞良久除西北
路副統賜廐馬弓矢佩刀從布薩忠義討契丹賊平改
華州防禦使與圖克坦喀齊喀經畧隴右喀齊喀復德

順至東山堡宋兵捍絕樵路世傑擊走之追至城下城中出兵約二萬餘復敗之宋經畧使荆阜棄德順走世傑與左都監璋追破其軍改亳州防禦使四遷通遠軍節度使宋人輒入鞏州境糶米麪有司執之世傑署案作歸附人縱遣之譯吏蔡松壽誣府主謀叛坐貶十八年起為弘州刺史使毋憂去職累遷亳州防禦使卒世傑少貧然疎財尚氣每臨陣破敵必戒士卒毋縱殺掠平居非忠不言親賢樂善甚獲當世之譽云

蕭懷忠本名海呼奚人也為西北路招討使蕭裕等謀
立遼後使蕭珠展往西北路結懷忠并結節度使耶律
朗為助懷忠與朗有隙遂執珠展并執朗遣使上變裕
等既誅懷忠為密樞副使賜今名復為西北路招討使
西京留守封王改南京留守契丹薩巴反復以懷忠為
西京留守西南面兵馬都統與樞密使布薩師恭北京
留守蕭蹟右衛將軍蕭圖喇護衛十人長鄂勒博往討
之大軍追薩巴不及海陵疑懷忠與蕭裕皆契丹人本

同謀恐其與薩巴合又以圖喇無功懷忠蹟師恭逸賊於是殺師恭蹟懷忠皆族滅其家並誅鄂勒懷圖喇大定三年追復懷忠等官爵

伊喇諱達遼橫帳人父瑠和與耶律伊都俱來降西京下復叛瑠和遇害諱達以父死事授左奉宸熙宗初充護衛累官東京副留守完顏守道經畧北方諱達攝咸平路屯軍都統入為兵部侍郎除武定軍節度使以招徠邊部功遷東北路招討使改臨橫尹卒諱達騎射絕

倫善相馬嘗閱馬於市見馬甚羸瘦以善價取之他日果良馬也

富珠哩阿老罕隆州伯爾克山人年八歲選習契丹字再選習女真字既壯為黃龍府路萬戶令史貞元二年試外路胥吏第一補宗正府令史累遷尚書省令史布薩忠義討幹罕辟置幕府掌邊關文字幹罕既平阿老罕招集散亡復業者數萬人復從忠義伐宋屢入奏事論列可否宋人請和忠義使阿老罕往和議定入奏忠

義薦阿老罕有才幹授尚書省都事除同知順天軍節度事累遷侍御史復以赫舍哩良弼薦遷勸農副使兼同修國史侍御史如故改右司郎中奏請徙河南戍軍屯營城中者於十里外從之遷吏部侍郎除山東統軍都監徙置河南八明安遷武勝節度使入為吏部尚書改西南路招討使有司督本路明安人戶所貸官粟阿老罕乞俟豐年從之軍人有以甲葉貿易諸物天德權場及界外歲采銅礦或因私挾兵鐵與之市易皆一切

禁絕上番軍不許用親戚奴婢及傭雇人營塹損圯以
時葺治不與所部明安穆昆會晏故兵民皆畏愛之改
陝西路統軍使兼京兆尹陝西軍籍有闕舊例用子弟
補充多不堪用阿老罕於伊勒希旗鼓手內選補軍人
以春牧馬經夏不收飼眷弱多死阿老罕命以時收秣
之故死損者少仍春秋督閱軍士騎射以嚴武備終南
來漆者節其期限檢其出入以防姦細帝以阿老罕為
人沉厚所至稱治召為叅知政事命條上天德陝西行

事帝稱善以疾乞致仕除北京留守卒

完顏薩哈上京納爾琿河人其先居烏楞古河身長多力善用槍金師南征睿宗為右副元帥置麾下佩以金牌使督軍事天德元年授本班祇候郎君詳袞後從軍泰州路軍帥以薩哈為萬戶領尼楚赫等明安戍北邊數有戰功二年正月遣使夏國諭以即位事因令伺彼之意既還稱旨為兵部郎中改同知會寧尹累遷海蘭路都總管海陵伐宋授衛州防禦使為武震軍都總管

世宗即位遣使召薩哈既至除武昌軍節度使改安化軍兼山東路副都統大定四年徙鎮安武仍兼副統領山東大名東平三路軍八萬餘渡淮會大軍伐宋進至楚州宋遣使奉歲幣還邳州卒

龐迪字仲迪延安人少倜儻喜讀兵書習騎射學推步孤虛之術無所用乃應募隸涇原路第三副將破賊有功授保義郎嘗從百餘騎經行山谷遇夏人數千衆駭懼請避迪躍馬犯陣敵皆披靡身被重創完軍以還自

是知名擢為正將尋以張中孚薦授迪權知懷德軍兼沿邊安撫使夏軍五萬薄城迪開門待之敵不敢入因以數千騎分門突出遂破之獲軍資甚衆復破闕師古兵擢知鎮戎軍尋擢淮南東路馬步軍副總管總制沂密淮陽兼權知沂州尋為環慶路兵馬都鈐轄權知邠州齊國廢改華州防禦使

按金地理志華州宋鎮潼軍節度治國初因之皇統二年

降為防禦使本傳除授在天眷以前而云防禦使者從乎其後也

以

軍變被執已而賊衆

悔曰公為政素善豈宜劫辱縱之還復領州事天眷初

歷臨洮尹兼熙秦路兵馬都總管陝右大飢流亡四集

迪開渠溉田民咸利之官制行迪以博州團練使

按金地理

志博州有防禦使無團練使

特授定遠大將軍皇統七年除慶陽尹

歷三考不易以治最聞詔書褒美正隆元年遷鳳翔尹

屢上章求退不許海陵南伐徵斂頻急官吏因緣為姦

富者用賄以免貧者益困迪悉召民使共議增減不加

威督而役力均人情大悅五年徙汾陽軍節度使大定

初復為臨洮尹遷南京路都轉運使以省事惜費安靜

為政河南稱之徙絳陽軍節度使卒於官迪性純孝父疾醫藥弗効迪仰天泣禱剋股作羹由是獲安昆弟析家財迪盡以與之官爵之廢率先諸姪疾草沐浴朝服而逝

伊喇成本名婁其先遼橫帳人沉勇有謀通契丹漢字天會間隸達蘭為行軍明安與宋人戰楚泗間以所部先登大破宋軍功最諸將劉麟約會天長軍成與瓜爾佳察噶納俱為達蘭前鋒得宋生口為鄉導遂達天長

睿宗嘉之從宗弼將兵廢齊國及再伐宋攻濠州每臨戰輒先登多所摧破宗弼再取河南成及蕭懷忠等八明安先渡河南平第功授宣武將軍除威州刺史用廉擢同知延安尹再遷昭義軍節度使正隆南伐為武毅軍都總管薩已反海陵以事誅契丹名將成以本軍守磁即遣妻子還汴海陵用是不疑時人高其有識改神武軍都總管與富珠哩定方為浙東道先鋒使由淮陰進兵以所部護糧赴揚州敵兵乘夜來攻成整兵奮擊

斬刈甚衆會海陵死軍還復鎮昭義大定二年以廉在
優等改河中尹再除臨洮尹招降喬嘉等族首領扎實
結遷南京留守召拜樞密副使封任國公改北京留守
卒訐聞帝悼惜之授其子舒蘇鄂博武功將軍世襲咸
平路察察哩明安下哲伯埒穆昆扎實結者西番唃廝
囉之裔其先棟戩及子已沁結始附宋賜姓趙改名順
忠續文獻通考作忠順傳至世昌受宋官襲已延族長朝廷定陝
西果爾族長京臧殺世昌朝廷遣兵執京臧斬之以世

昌子特爾格為巴延族都管大定四年宋人破洮州特爾格弟扎實結走入喬嘉族避之喬嘉族首領巴爾布與鄰族木波隆普龐巴巴哩四族耆老大僧等立扎實結為木波四族長其地高寒無絲枲五穀惟產青稞與野菜合酥酪食之疆境八千里合四萬餘戶隨草水畜牧遷徙不常扎實結念朝廷為其父報讐欲棄四族歸朝四族不許成至臨洮使人招扎實結乃率四族來附焉

舒穆魯卞本名阿爾噶哩五代祖旺古遼駙馬都尉父
烏錦為羣牧使從睿宗秋山卞年十三已能射連獲二
鹿睿宗竒之天會末宗弼為右監軍召卞隸帳下時宗
磐為太師達蘭為左副元帥人爭附之使召卞卞不往
宗磐達蘭皆以罪誅人多其識從宗弼與宋人戰於順
州卞身被七創率勇士十餘騎奮擊大敗之還授忠勇
校尉遷宣武將軍除河間少尹察廉升遂州刺史改壽
州再改唐州海陵伐宋卞為武毅軍都督總管由別道

進兵遇宋伏兵擊敗之遂下信陽軍及羅山縣至蔣州

按金地理志無獎州宋志載紹興二十八年以避海陵子光英諱改光州為蔣州其地與汝州相接正宋金邊

境也本傳誤作獎州謹據改

宋守將棄城遁因取其城大定二年除

鄭州防禦使以本官領行軍萬戶伐宋遷武勝軍節度

使宋人請和明年有金牛數百頭自淮南走入州境僚

佐欲收之卞不聽復驅過淮還之遷河南尹轉西南路

招討使改大名尹大名多盜而城郭不完卞請修城制

可城完葺盜不得發徙臨洮尹卒於官

伊喇道本名按宗室伊喇古為山東東路兵馬都總管
辟掌軍府簿書往來元帥府計議邊事右副元帥宗弼
愛其才召為元帥府令史補尚書省令史特除監察御
史再遷大理寺丞兼工部員外郎海陵南伐使督運粳
糧所在盜起道路梗塞間關至淮南上謁具言盜賊狀
海陵惡聞其言杖之大定二年除工部侍郎奉詔招撫
諸奚是時茂巴爾明安下穆昆等皆欲降制於明安和
卓不敢解甲道發兵掩襲和卓子婦及穆昆瑠球佛寧

博索等妻孥適幹罕遣博索發茂巴爾明安軍聞家人
被獲遂來降改禮部郎中奉使河南勸課農桑密訪吏
治得失累遷御史中丞同修國史廉問職官殿最改同
知大興尹事詔曰京師士民輻輳犯法者衆罪狀自實
毋為文所持斷之以公勉副朕意遷刑部尚書尚廢局
使宗夔副使舒穆魯成格勒私用官帑事覺點檢烏凌
阿天錫屬刑部使輕其罪刑部以付大興府鞠治於是
道及天錫皆坐解職尋起為大理卿兼簽書樞密院事

再遷西京留守卒

楊仲武字德威保安人父遇以勇聞闕西為宥州團練使仲武謁宋經畧使王庶求自効遂用為先鋒羅索入關仲武與鄜延路兵馬都監鄭建克俱降為安塞堡環慶路兵馬都監皇統初將兵戍鳳翔屢却宋軍除知寧州關中薦饑境內盜賊縱橫仲武悉平之改坊州刺史復知寧州遷同知臨洮尹改同知河中府海陵營繕南京典浮橋工役臨洮地接西羌與木波雜居邊將貪暴

木波苦之遂相率為寇掠仲武前治臨洮從數騎入其營諭以禍福羌人喜悅寇掠遂息至是木波復掠熙河熙河主帥使人諭之不肯去曰揚總管來我乃解去熙河具奏詔復遣仲武仲武至與其酋帥相見責以負約對曰邊將苦我今之來求訴於上官耳幸見公願終身不復犯塞乃舉酒酌天折箭為誓羅拜而去及伐宋以仲武為威定軍都總管駐兵歸德大定三年除武勝軍節度使改陝西西路轉運使卒

趙興祥平州盧龍人六世祖思溫遼燕京留守封天水
郡王父瑾遼靜江軍節度使興祥以父任閤門祇候謁
告省親于白霄會遼季土賊據郡作亂興祥攜母及弟
妹奔燕京不能進乃自柳城涉砂磧夜視星斗而行僅
達遼軍不知遼主所向遂還柳城及羅索獲遼主興祥
乃歸國從宗望伐宋為六宅使天眷初累官同知宣徽
院事母憂去官熙宗素聞興祥孝行及英悼太子受冊
以本官起復護視太子轉右宣徽使天德初改左宣使

使海陵嘗問興祥欲使子弟為官當自言興祥辭謝海陵善之遷濟南尹改絳陽軍節度使召為太子少保封廣平郡王改封鉅鹿正隆初例奪王爵遷太子少傅封申國公起為定武軍節度使世宗即位興祥來見於平川世宗嘉其誠款以為秘書監復為左宣徽使命傳詔罷神龍殿涼位工役久之以其孫珣為閤門祗候大定十五年帝幸安州春水召興祥赴萬春節謁於良鄉感風眩未幾卒

舒穆魯榮字昌祖七世祖仕遼封順國王遼主奔天德
榮父特頁挺身赴之時榮方六歲母鴻特們携之流離
道路宗室實庫得之納為次室榮就養于實庫家特頁
見遼主委以軍事軍敗被執將殺之金源郡王主尼楚
赫白曰彼忠於所事殺之何以勸後遂釋之後從伐宋
卒于軍中榮年長隸宗翰幕府天眷二年充護衛熙宗
宴飲命胙王元與榮角力榮勝之連仆力士六七人熙
宗親飲之酒賜以金幣遷宿直將軍天德初除開遠軍

節度使其母尚在實庫家入謝不覺泣下海陵問故以實對乃詔其母與俱行累改延安東平尹海陵南征為神果軍都總管留駐泗州以遏逋卒大定初還鎮東平與戶部尚書梁球按治山東盜賊二年以本官充山東東西大名等路都統有疾改太原尹徙益都尹召為簽書樞密院事歷北京東京南京西京留守坐高賈賣私物抑賈買民物削兩階解職久之除臨潢尹改臨洮尹卒

敬嗣暉字唐臣易州人登天眷二年進士第調懷安丞
遷弘政令補尚書省令史有才辯海陵為相愛之及篡
立擢起居注歷左宣徽使拜參知政事正隆六年伐宋
留張浩及嗣暉于南京治尚書省事世宗即位御史大
夫完顏元宜劾奏蕭玉嗣暉許霖等六人不可用嗣暉
降通議大夫放歸田里尋以練習朝儀起為丹州刺史
母憂起復為左宣徽使世宗頗好道術謂嗣暉曰尚食
官母于禁中殺羊豕朔望上七日有司毋奏刑名久之

有榜匿名書于通衢者稱海陵舊臣怨望將圖不軌帝知其誣因謂嗣暉曰卿性明達能辨但頗自銜釣衆人之譽所以致此媒孽後當改之大定十一年

按世宗紀大定十一

年十一月丁亥有事于園丘前一月壬寅朔嗣暉拜參知政事本傳記作十年謹據改正將有事南郊復拜參知政事以執政官服攝太常禮成而卒

富察通本名富埒瑄中都路額特赫格們明安人熙宗選護衛以父老懇乞就養朝廷義而從之後以門閥加昭信校尉授頓舍改御院通進海陵伐宋以通領隆州

諸軍至淮率騎二百先濟硯敵及弇中敵兵躍出有舞
槊來刺者通射之應弦而斃諸軍併擊敗之至揚州通
營別屯間海陵遇弑哀問仆地衆掖而起徑入營門哭
之軍還入見世宗授尚廢局副使幹罕反命通佩金符
詣軍前督戰賊破以功授世襲穆昆奚人亂承詔繼往
莅軍遷本局使以母喪免起為殿前右衛將軍兼領閑
廐尋命其子富色哩尚衛國公主出為肇州防禦使尋
擢扶餘路節度使累除殿前都點檢大定十七年拜尚

書右丞轉左丞詔議推排明安穆昆事大臣皆以止驗
見在產業定貧富依舊科差為便通言必須通括各穆
昆人戶物力多寡則貧富自分貧富分則版籍定如有
緩急驗籍科差富者不得隱貧者不重困矣帝是通言

閱三歲

按世宗紀以左丞富察通平章政事在
大定二十一年三字當係五字之誤

進平章

政事封任國公世宗將幸上京命通為上京留守先往
鎮撫之二十五年除知真定府事未幾改知平陽府事
移鳳翔致仕明昌四年帝以通先朝重臣年雖高而未


衰命知廣寧府累表請老復以開府儀同三司致仕承安三年薨舊制致仕宰相無祭葬禮通以舊臣懿戚特命敕祭及葬初通在政府舉太子率府完顏守貞監察御史喬俱可大用後皆為名臣世多其知人云

鈕鈇祿額特埒蓋州巴哩瑪明安希楚穆昆人貞元初以習女真字試補戶部主事歷右補闕修起居注九年河南統軍宗叙上書言宋人欲啟兵釁帝遣額特埒就問其實至汴召凡言邊事者詰之皆無狀還報世宗喜

曰朕固知妄也授左司員外郎十年以夏國發兵築祁安城及襲殺喬嘉族首領扎實結又諜言夏與宋人通謀犯邊詔大理卿李昌圖與額特埒往按其事夏人報言扎實結以兵犯夏境故殺之祁安城本工國所賜舊積石地發兵修築以備他盜耳又察知宋夏無交通狀及喬嘉族民戶願令扎實結姪趙師吉為首領具以聞世宗甚悅轉右將軍十二年為夏國生日使還授右司郎中遷右副都點檢久之出為河南路統軍都監十七

年授武昌軍節度使兼領前職明年入為刑部尚書拜
參知政事二十二年委提控代州阜通監二十三年進
尚書右丞二十六年轉左丞世宗與宰臣議可授執政
者額特埒奏曰宗浩幹能可任遂用宗浩二十八年為
上京留守明昌二年致仕承安初有事北方朝廷欲任
舊臣起為東京留守明年改上京留守許以便宜行事
二年九月還朝拜平章政事封芮國公在位數月薨謚
成肅額特埒性溫厚醞藉嘗為丞相赫舍哩良弼所薦

世宗以良弼為知人在相位十餘年甚見寵遇唯奏定
五品官子與外路司吏同試部令史及令隨朝吏員得
試國史院書寫世宗以為非云



欽定續通志卷四百三十二

欽定四庫全書

史部

欽定續通志卷四百三十四

編修臣謝振定覆勘

總校官原任侍講臣王燕緒

欽定四庫全書

欽定續通志卷四百三十三

列傳

金

十一

圖克坦克寧

宗浩

襄

思烈

瓜爾佳清臣

瓜爾佳衡

完顏安國

裕爾伯特

圖克坦克寧本名錫馨其先金源縣人徙居北古土之

地後徙置明安于山東遂占籍萊州克寧資質渾厚寡言笑善騎射有勇略通女真契丹字舅氏希尹薦其材以爲符寶祇候累遷至忠順軍節度使克寧娶宗幹女嘉祥縣主同母兄富勒堅判大宗正事海陵心忌之出爲西京留守構致其罪誅之因降克寧知滕陽軍厯海蘭路兵馬都總管大定初詔克寧以本路兵會東京遷左翼都統從右副元帥完顏默音討契丹幹罕趨濟州默音用契丹降吏奇徹計襲賊輜重克寧與赫舍哩志

寧爲殿與賊遇于長樂默音使伏兵于左翼之側賊二萬餘躡其後又以騎四百餘突出左翼伏兵之間克寧與善射二十餘人拒之衆欲俟大軍至克寧不可於是奮擊賊乃却左翼萬戶襄與大軍合擊之賊遂敗追奔十餘里時二年四月一日也越九日復追及于霧霖河左翼軍先與賊戰克寧以騎三千追掩十五里賊迫澗不得亟渡殺傷甚衆而大軍尚未至賊遂引而南時幹罕已再北元帥默音利虜掠駐師白灤世宗訝其持久

遣問之默音以馬弱爲辭朝廷乃召還默音以平章政

事布薩忠義兼都右副元帥

按世宗紀及布薩忠義傳皆作兼右副元帥此處誤

作都元帥謹改

師將發賊聲言乞降克寧曰賊初困蹙且無降

意所以揚言者欲緩吾師也不若乘其未備急擊之可

一戰而定也忠義以爲然乃與克寧出中路敗賊兵于

婁博囉之地賊奔七渡河負險爲柵克寧覘柵背可上

乃潛師夜登俯射之大軍自下攻賊潰皆遁去契丹平

克寧除太原尹未閱月宋吳璘侵陝右元帥左都監圖

克坦喀齊喀乞益兵遣克寧佩金牌駐軍平涼詔喀齊
喀曰朕遣克寧參議軍事此其智勇足敵萬人不必益
軍也克寧至下令安輯未幾民皆完聚改益都尹兼山
東路兵馬都總管行軍都統四年詔益克寧兵二千出
軍楚泗之間以伐宋宋將魏勝取弊舟鑿其底貫以大
木列植水中別以船載巨石貫以鐵鑊沈之水底以塞
十八里口及淮渡舟路以步兵四萬人屯於淮渡南岨
運河之間克寧使錫默和尚選善游者拔出植木徹去

沉船進至淮口宋兵來拒隔水矢石俱發錫默和尚以竹編籬捍矢石師遂入淮與宋兵奪渡口合戰數四明安長壽先行薄岨水淺率勁涉水登岨敗其津口兵卒五百人餘衆皆濟宋兵四百餘自清河口來鎮國上將軍富察鄂蘭哈瑪爾以兵百餘人禦之宋大兵整陣來拒克寧虜兵前戰自旦至午宋兵敗踰運河爲陣明安楚呼戰不利克寧以明安薩喇九十騎橫擊之宋兵大敗追至楚州射殺魏勝遂取楚州及淮陰縣是役也薩

喇功居多時宋屢遣使請和布薩忠義赫舍哩志寧約以世爲叔姪國割還海泗唐鄧四州兵罷改大名尹歷河間東平尹召爲都點檢遷樞密副使兼知大興府事改太子太保樞密副使如故拜平章政事封密國公克寧女嫁爲潘王永成妃得罪罷爲東京留守明年改南京留守兼河南統軍使至京師入見復拜平章政事授世襲伯奇圖河明安兼親管穆昆徙其親族在山東者居之近地二十年

原文作十九年
依世宗紀改

拜右丞相徙封譚國

公按王圻續文獻通考及金百官志載封國之號八
十而不及譚豈封號迭有變更而志未之載歟克

寧爲相持正守大體至於簿書期會不屑屑然也二十
一年爲左丞相徙封定國公屢求致仕不許未幾以司
徒兼樞密使二十二年詔賜今名二十三年復以年老
爲請帝曰卿昔在政府勤勞夙夜除卿樞密使亦可以
優逸矣朕念舊臣無幾人萬一邊隅有警選將帥授方
略山川險要兵道軍謀舍卿誰可與共者勉爲朕留克
寧乃不敢復言二十四年世宗幸上京皇太子守國詔

左丞相守道與克寧俱留中都輔太子二十五年左丞相守道賜宴北部詔克寧行左丞相事時世宗在太平山清暑皇太子薨於京師諸王妃主入臨奴婢從入者多頗喧雜不嚴克寧遣出之身護宮門嚴飭殿廷宮門禁衛皆如法章宗時爲金源郡王哀毀過甚克寧諫曰哭泣常禮也郡王身居冢嗣豈以常禮而忘宗社之重乎召太子侍讀完顏匡謹視郡王勿去左右訃至天平帝聞克寧嚴飭宮衛謹護皇孫嘉其忠誠愈重之帝還

京師克寧表請立金源郡王爲皇太孫以係天下之望
踰月有詔起皇孫判大興尹封原王二十六年以克寧
爲太尉兼左丞相原王爲右丞相因使克寧輔導之世
宗與宰相論錢幣帝曰今京師積錢止五百萬貫除屯
兵路分其他郡縣錢可運至京師克寧曰郡縣錢盡入
京師民間錢益少矣若起運其半其半變折輕齎庶幾
錢貨流布也帝嘉納之克寧以原王未正太孫之位屢
請於世宗十一月戊午入見于香閣率宰臣屏左右奏

立太孫世宗許之庚申詔立原王右丞相爲皇太孫明年正月復求解機務帝勉留之乃給假歸鄉土以四月還朝未幾以丞相監修國史帝問史事奏曰臣聞古者人君不觀史願陛下勿觀帝曰朕豈欲觀此深知史事不詳故問之耳初盧溝河決久不能塞乃封盧溝水神爲安平侯久之水復故道帝曰鬼神感應如此克寧奏曰神之所佑者正也人事乖則弗享矣報應之來皆由人事帝是其言世宗頗信神仙浮圖之事故克寧及之

宋孝宗即位遣使進前王遺物帝怪其薄克寧曰此非常貢責之近於好利帝是之二十八年十一月癸丑帝幸克寧第賜金器錦繡重綵克寧亦有獻帝飲歡甚詔畫克寧像藏內府十二月乙亥世宗不豫詔克寧輔皇太孫乙酉詔太孫與諸王大臣俱宿禁中克寧奏曰皇太孫與諸王宜別嫌疑正名分宿止同處禮有未安詔太孫居慶和殿東廡丙戌詔克寧以太尉兼尚書令封延安郡王平章政事襄爲右丞相右丞張汝霖爲平章

政事戊子詔克寧褰汝霖宿於內殿二十九年正月癸巳世宗崩于福安殿是日克寧等宣遺詔立皇太孫爲皇帝是爲章宗徙封爲東平郡王詔克寧朝朔望朝日必爲克寧設坐克寧侍立益敬即位詔文凡除名開落官吏並量材錄用張汝霖奏真盜枉法不可恕克寧曰陛下初即位行非常之典臧吏誤沾恩宥其害小國之大信不可失也章宗深然之無何進拜太傅兼尚書令賜尚衣玉帶乞致仕不許尚書省奏明安穆昆願試進

士者聽之帝曰其應襲明安穆昆者學於太學可乎克
寧曰承平日久今之明安穆昆其材武已不及前輩萬

一有警使誰禦之習辭藝忘武備於國弗便帝曰太傅

言是也章宗初即位頗好辭章而疆場方有事故克寧

言及之明昌元年

原文作二年
依章宗紀改

克寧屬疾章宗往視之

即榻前拜太師封淄王加賜甚厚二年正月

原文蒙上
二年之誤

作是歲二月今
並依本紀改正

薨遺表言人君往往重君子而反疎之

輕小人而終昵之願陛下慎終如始安不忘危而言不

及私詔有司護喪事歸葬萊州諡曰忠烈五年配享世宗廟庭圖像衍慶宮大安元年改配享章宗廟庭

宗浩字師孟昭祖四世孫漢國公昂之子也貞元中爲海陵寢殿實達爾世宗即位遼陽昂遣宗浩馳賀命充符寶祇候大定二年冬昂以都元帥置幕山東宗浩領萬戶從行仍授山東東路兵馬都總管丁父憂起復承襲因綿烏爾袞明安授河南府判官授同知陝州防禦使事察廉能第一等進官一階累遷哈斯罕節度使二

十三年徵爲大理卿踰年授山東路統軍使兼知益都府事二十六年爲賀宋主生日使還授刑部尚書俄拜參知政事章宗即位出爲北京留守三轉同判大睦親府事北方有警命宗浩佩金虎符駐泰州便宜從事朝廷發上京等路軍萬人以戍宗浩以糧儲未備且度敵未敢動遂分軍就食隆肇間是冬果無警北部光嘉喇者尤桀驁屢脅諸部入塞宗浩請乘其春暮馬弱擊之時準布亦叛內族襄行省事于北京議欲留光嘉喇以

牽準布宗浩奏國家以堂堂之勢不能掃滅小部顧欲藉彼爲捍乎臣請先破光嘉喇然後提兵北滅準布章再上從之宗浩覘知哈達濟與博斯和等相結光嘉喇之勢必分彼方畏討而復掣肘仇敵理必求降可呼致也因遣主簿薩領軍二百爲先鋒戒之曰若光嘉喇降可就徵其兵以圖哈達濟仍偵餘部所在速使來報哈達濟者與占楚琿皆北方別部恃強中立無所羈屬往來準布光嘉喇間連歲擾邊皆二部爲之薩入敵境光

嘉喇果降遂徵其兵萬四千騎馳報以待宗浩北進命
人齎三十日糧報薩會于伊瑪河共擊敵而所遣人誤
入博斯和部由是東軍失期宗浩前軍至特爾格山遇
占楚琿所統舒嚕歡塔兩部擊走之進至和碩水敵勢
大蹙於是哈達濟部長布古岱占楚琿部長呼巴拉及
博斯和所遣和者皆乞降宗浩承詔諭而釋之呼巴
拉因言所部必里克圖近在伊瑪河不肯偕降乃移軍
討之哈達濟等西渡伊瑪棄輜重遁去薩與光嘉喇部

長塔里琿追躡及之於沃哩布永縱擊大破之軍還博
斯和乞內屬并請置吏乃優詔褒諭遷光祿大夫以所
獲馬六千置牧以處之明年拜樞密使封榮國公初朝
廷置東北路招討使泰州去境三百里每敵入出兵追
襲敵已遁去至是宗浩奏徙之金山以據要害設副招
討二員分置左右由是敵不敢犯中都山東河北屯駐
軍人地土不贍官田多爲民所占命宗浩行省事詣諸
道括籍凡得地三十餘萬頃還坐以倡女自隨被劾出

知真定府事徙西京留守復爲樞密使進拜尚書右丞
相超授崇進時北邊不寧議築壕壘以備守戍廷臣多
言不可宗浩獨謂便乃命宗浩行省事以督其役功畢
褒賚甚厚薩里部長圖古勒入塞宗浩以兵追躡與布
薩揆軍合擊之殺獲甚衆敵遁去徵還優詔獎諭躡遷
儀同三司進拜左丞相時舉兵南伐會平章政事揆病
乃命宗浩兼都元帥往督進討宗浩馳至汴大張兵勢
親赴襄陽巡師而還宋人大懼乃命知樞密院事張巖

以書請和宗浩以辭旨未順却之仍諭以稱臣割地縛
送元謀姦臣等事巖復遣方信孺齎其主誓藁來且言
併發三使將賀天壽節及通謝仍報其祖母哀並致書
于都元帥信孺自以和議遂成輒自稱通謝使所參議
官宗浩怒其輕妄數而遣之

按續通鑑開禧三年以方
信孺爲國信所參議官如

金軍又稱信孺以口舌折衝置死生
于度外本傳所云殆非信孺之罪也而復張巖書反覆

開諭其後宋人竟請以叔爲伯增歲幣備犒軍銀函姦
臣韓侂胄蘇師旦首以獻而請盟焉泰和七年九月薨

于汴訃聞帝爲輟朝命持繪像至都將親臨奠賻贈甚厚諡通敏

丞相褭本名安昭祖五世孫祖實古納從太祖平遼以功授上京世襲明安歷東京留守父阿魯岱皇統初北伐有功拜參知政事褭幼有志節善騎射多勇略年十八襲世爵大定初從左副元帥默音討斡罕戰于肇州長漂褭足中流矢褭創鏖擊七戰皆勝追賊於霭霏河賊乘風縱火褭亦縱火立空地以族戰十餘合賊益困

襄率衆搏戰大敗之俘獲萬計會朝廷遣布薩忠義代
默音襄復從忠義追賊至諾爾嶺西之陷泉率右翼身
先奮擊賊大潰及幹罕就擒論功第一特授亳州防禦
使時年二十三宋人犯南鄙襄爲穎壽都統率甲士二
千渡潁水敗敵兵五千復潁州生擒宋帥楊思次濠州
宋將郭太尉退保橫澗山襄攻之伏弩射中其膝督攻
愈急拔之獲郭太尉既而趨滁州襄爲先鋒將至清流
關得宋偵者知敵欲發兵三道夜出襄乃率騎二千分

二道一由衝路自以千兵間道潛登既近敵始覺襄攻
克之據其關及宋乞盟班師召爲拱衛直都指揮使累
遷海蘭路兵馬都總管左丞相志寧疾甚世宗臨問之
志寧薦襄智勇兼濟有經世才即召授殿前左副都點
檢爲宋生日使宋方祈免親接國書襄折之成禮而還
授陝西路統軍使入爲吏部尚書轉都點檢世宗謂宰
執曰襄爲人甚蘊藉非直日亦入宮規畫諸事事有所
付乃退其公勤如此擢御史大夫踰月拜尚書右丞進

拜左丞襄在外任治有異効至是朝廷以襄賞廉吏詔
天下列其名以示獎勵二十三年進拜平章政事封蕭
國公皇孫將加王爵招擇國號襄曰爲天下大計必先
正其本原者本也請封原從之初諸部族節度使僚屬
多用紂人頗有私縱不法者議改用諸色人襄曰北邊
雖無事恒須經略若杜此門其後有勞績何以處之請
如舊他日議及古有監軍之事襄曰漢唐初無監軍將
得專任故戰必勝攻必克叔世始監以內臣動爲所制

故多敗而少功若將得其人監軍誠不必置並嘉納之
詔受北部進貢使還世宗問邊事具圖以進因上羈縻
屬部鎮服達實之策詔悉行之進拜右丞相徙封戴世
宗不豫與太尉圖克坦克寧及平章政事張汝霖宿內
殿同受顧命章宗初即政議罷僧道奴婢太尉克寧奏
曰此蓋成俗日久若據更之於人情不安襄曰出家之
人安用僕隸乞悉放爲良若寺觀物力元係奴婢之數
推定者並合除免詔從襄言由是二稅戶多爲良者明

昌元年同知棣州防禦使膏上封事歷詆宰執克寧奏
襄預知出知平陽府事歷西京留守召授同判大睦親
府事進樞密使復拜右丞相改封任會左丞相瓜爾佳
清臣北禦邊措畫乖方命襄代將其衆佩金牌便宜從
事時呼必紇亦叛嘯聚北京臨潢之間襄至遣人招降
尋出師大鹽濼復遣右衛將軍瓜爾佳清臣傳完顏充
進軍烏魯斯城欲屯守俟隙進兵繪圖以聞議者異同
即召面諭厚賜遣還未幾遣西北路招討使完顏安國
傳作兩路

都統完顏安國等趨多泉子密詔進討乃分支軍出東道

襄由西道而東軍至龍駒河爲準布所圍三日不得出
求援甚急襄即鳴鼓夜發遲明距敵近衆請少憩襄曰
吾所以乘夜疾馳者欲掩其不備爾緩則不及嚮晨壓
敵突擊之圍中將士亦鼓譟出大戰衆皆奔斡勒嘉河
遣安國追躡之衆散走降其部長遂勒勲九峰石壁捷
聞遣使厚賜以勞之別詔許便宜賞賚士卒九月赴闕
拜左丞相監修國史封常山郡王十月準布復叛襄出

屯北京會羣牧契丹圖卜蘇德壽等據信州叛僞建元
曰身聖衆號數十萬遠近震駭襄閑暇如平日人心乃
安初襄出鎮謂僚屬曰北部犯塞不足慮第恐姦人乘
隙而動北京近地軍少當預爲之備即遣官發上京等
軍六千至是果得其用分遣臨潢總管烏庫哩道遠咸
平總管富察守純進討擒德壽等送京師契丹之亂廷
臣議罷郊祀又欲改用正月上辛帝遣使問之對曰郊
爲重禮且先期詔天下又藩國已報表賀今若中罷何

以副四方之望至改用正月上辛乃祈穀之禮非郊見上帝之本意也大禮不可輕廢請決行之臣乞於祀前減賊既而賊破果如所料郊禮成進封南陽郡王始討契丹自龍虎衛上將軍節度使以下許承制授之襄以爲賞罰之柄非人臣所預不敢奉詔賊平請委近臣諭旨將士使知上恩乃遣李仁惠持宣三十敕百五十視功給之方德壽之叛諸紕亦剽略爲民患襄慮其與之合乃移諸紕居之近京地或慮其生變襄曰紕雖雜類

亦我邊民若撫以恩焉能無感我在此必不敢動後果
無患尋詔參知政事喬代領其軍入見賜錢五十萬明
年以內艱免尋起復視事時議以契丹戶之驅奴尚衆
乞盡鬻以散其黨襄以爲非便奏請量存口數餘悉官
贖爲良從之北部復叛喬戰失律復命襄爲左副元帥
蒞師尋拜樞密使兼平章政事屯北京民方艱食乃減
價出糶倉粟以濟之民皆悅服時議北討襄奏遣同判
大睦親府事宗浩出軍泰州又請左丞衡於撫州行樞

密院出軍西北路以邀準布而自帥兵出臨潢帝從其策其後色微部族詣撫州降乃專使問襄襄以爲受之便賜寶劔詔度宜窮討乃令士自賫糧以省輓運進屯於默音埒里額穆爾蘇等山以逼之因請就用步卒穿濠築陣起臨潢左界北京路以爲阻塞詔可襄親督視之軍民並役兼募饑民五旬而畢於是西北西南路亦治塞如所請無何泰州軍與敵接戰宗浩督其後殺獲過半諸部相率送款襄納之自是北陲遂定襄還臨潢

減屯兵四萬馬二萬匹帝以信符召還入獻邊機十事
皆爲施行仍厚賜之復拜左丞相四年正月進拜司空
領左丞相如故襄重厚寡言務以鎮靜守法每掾有所
稟必問諸相云何及當從某議識者謂其得相體時頗
更定制度初置提刑司又議設清閑職位如宋朝宮觀
使以待年高致仕之官襄言朝廷養以俸廩恩禮至渥
老不爲退復有省會之法所以抑貪冒長廉節若擬別
設恐涉于濫又言省事不如省官今提刑官吏多無益

於治徒亂有司事皆聽納之俄乞致仕不許時方旱襄
等上表待罪帝下罪已詔仍慰諭襄等視事泰和元年
承命馳禱于亳州太清宮及后土方嶽以其世封遠特
改授河間府路算卓和明安明年既祀嵩嶽還次芝田
之府店遂以疾薨諡曰武昭命張行簡銘其碑襄明敏
才武過人帝親待之厚故所至有功在政府二十年明
練故事簡重能斷器局尤寬大待掾吏盡禮用人各得
所長爲當世名將相大安間配享章宗廟庭子思烈

思烈自五六歲入宮充奉御宣宗入承大統呼沙呼跋
扈思烈尚在髻亂嘗涕泣跪抱帝膝曰願早誅權臣以
靖王室帝急顧左右掩其口自是甚器重之天興元年
汴京被圍哀宗以思烈行省事于鄧州會武仙引兵入
援思烈亦發兵過密縣遇元兵不用武仙阻澗之策遂
敗績于京水尋守中京元兵圍之未能下崔立遣人監
其子於城下招之使降思烈不顧令軍士射之既而知
崔立已以汴京歸順病數日而死初思烈與仙論議不

合左右司員外郎王渥勸曰武仙大小數百戰經涉不

爲不多兵事當共議已而思烈果敗渥歿於陣

按劉祁歸潛志

云興定初渥從持嘉喀齊喀出援武仙大戰歿于陣中州集則云中牟失利不知所終所載與本傳互異

字仲澤太原人博學善談論工尺牘字畫清美興定二

年進士爲興屯邦獻完顏埒默所知多在兵間後辟寧

陵令有治蹟入爲尚書省令史使宋至揚州應對敏給

宋人重之及思烈往鄧州以渥從行

瓜爾佳清臣本名阿卜薩呼爾哈路罕都人姿狀雄偉

善騎射皇統八年襲祖布達明安世宗即位率本部軍
六千赴中都以功遷昭武大將軍從右副元帥赫舍哩
志寧爲管押萬戶接應左都監完顏思敬逐斡罕餘黨
敗之柔遠至茂巴勒達悉獲之賊平遷鎮國上將軍知

潁順軍事會宋兵二萬陷汝州殺刺史烏克遜滿丕河

南統軍宗尹

按世宗紀大定二年河南統軍使宗尹復汝州此處誤作宗正謹據改

遣清

臣與萬戶富珠哩定方等領騎兵四千往擊之宋人棄
城遁遂復汝州大定三年從志寧復取宿州大敗宋將

李世輔復以兵追襲又敗之捷聞授宿州防禦使移博
州改西北路招討都監遷烏爾古實壘部族節度使十
二年歷左右都點檢出爲陝西路統軍使兼知京兆府
事二十六年改西京留守閱三載遷樞密副使明昌
元年以其女爲昭儀眷倚益重二年拜尚書左丞頃之進
平章政事封萬國公四年遷右丞相監修國史未幾遷
崇進改封戴尋上表丐閒不許固請乃賜告省親給假
五十日馳驛以往清臣省覲還謁帝帝問呼爾哈路風

俗何如對曰視舊則稍知禮貌而勇勁不及矣因言西南西北等路軍人其閑習弓矢亦非復曩時六年遷儀同三司進拜左丞相改封密受命出師行尚書省事於臨潢府清臣遣人傾知虛實以輕騎八千令宣徽使伊喇敏爲都統左衛將軍充招討使完顏安國爲左右翼分領前隊自選精兵一萬以當後隊進至哈里河前隊敏等於栲橈濼攻下十四營回迎大軍屬部色徹掩其所獲羊馬資物以歸清臣遣人責其賕罰北準布由此

叛去大侵掠上遣責清臣命右丞相褭代之承安五年
降授橫海軍節度使兼滄州管内觀察使尋復致仕泰
和二年薨子伊扎爾襲明安初議征討清臣主其事既
而領軍出征雖屢獲捷而貪小利遂致北邊不寧者數
歲天下尤之

瓜爾佳衡本名阿里布山東西路薩塔明安伊克達巴
穆昆人大定十三年初設女真進士衡中第四補東平
府教授累改應奉翰林文字世宗嘗謂宰臣曰女真進

士中如圖克坦鎰瓜爾佳衡厄瑪哈鑑皆有用材也遷
修起居注章京立爲侍御史轉右司員外郎數奏稱旨
升左司郎中明昌二年擢御史中丞未幾拜參知政事
三年八月以病表乞致仕詔撫慰不許四年詔賜今名
參知政事胥持國言區種法衡曰若苟有利古已行之
且用功多而所種少復恐荒廢土田徒勞民無益也進
尚書右丞六年遷尚書左丞尋出行省于撫州洎還入
朝聞父憂去上亟召回起復本職承安二年出爲上京

留守尋改樞密副使行院規畫邊事三年以修完封界
賜詔褒諭四年正月就拜平章政事封英國公薨賻贈
有加諡曰貞獻

完顏安國字正臣本名棟摩其先占籍上京世有戰功
祖錫伯授西路世襲哈濟穆昆安國有謀畫尤善騎射
正隆元年從軍爲穆昆常以少擊衆大定中爲常山簿
轉虹縣令會王府新建選充虞王府掾再遷儀鸞局副
使明昌元年改本局使會達實部長有乞修歲貢者朝

廷許其請詔安國往撫之至則率衆遠迓至帳望闕羅
拜執禮無情容時準布迫近塞垣隣部欲立功議邀安
國往討安國以未奉詔辭不可或以危言怵之不動衆
壯之餽贍如禮既還以奉使稱旨升武衛軍都指揮使
出爲西北路副招討六年左丞相瓜爾佳清臣出兵以
安國爲先鋒都統適臨潢泰州屬部叛安國先討定之
以功遷本路招討使兼威遠軍節度使承安元年大鹽
澤之戰殺獲甚衆詔賜金幣既而右丞相襄總大軍進

安國爲兩路都統大捷於多泉子裏遣安國追敵僉言糧道不繼安國曰人得一羊可食十餘日不如驅羊以襲之便遂從其計安國統所部萬人疾驅以薄之降其部長捷聞進官四級遷左翼都統二年以營邊堡功召簽樞密院事賜虎符還邊以便宜從事時並塞諸部降諭使輸貢如初進拜樞密副使泰和元年特授世襲西南路延晏河明安兼哈濟穆昆帝幸慶寧宮命安國嚴飭邊備奏西南路邊戍私竄者乞招誘以安人心帝是

其言三年以疾致仕封道國公四年起復前職卒贈特
進安國在軍旅十五年號令嚴明善伺知敵人虛實及
山川險易戰必身先士卒故所向輒克諸部入貢安國
能一一呼其祖先弟姪名字以戒諭之諸部皆震悚甚
爲鄰國所畏服

裕爾伯特北京路庫本明安托囉山穆昆人以軍功歷
海濱令遷徐王府掾以稱職再任御史臺察廉升同知
震武軍節度使事明昌初爲唐州刺史尋授西北路招

討副使未幾改東北路六年正月北兵圍慶州急伯特率本路軍往救敵解去承安元年丞相襄北伐伯特爲先鋒副統進軍至龍駒河爲準布所圍會襄引大軍至得解俄值六羣牧人叛伯特爲都統領步騎一萬次懿州敵數萬逆戰伯特陷陣奮力擊却之身中二創捷聞遷一官二年乂軍千餘出沒剽掠錦懿間伯特追敗之復獲所掠悉還本戶三年從宗浩爲左翼都統戰伊瑪河及骨堡子西殺獲甚衆五年授知廣寧府事俄改東

北路招討使以捍邊有功賜詔褒諭三遷爲崇義軍節
度使泰和六年卒贈金紫光祿大夫伯特勇決善戰自
幼以軍功顯任兵鎮十餘年所向克捷凡再遷官賜金
幣甚爲帝倚注云

欽定四庫全書

卷四百三十三

欽定續通志卷四百三十三